

www.BibleForChildren.org


Matiu (Matyu) 1




Ye kene yo Ilisapet kaponu a inepe le taudu limi
be atu iman a ila ye in nga, ngan Maro iwanga
bangabangana ki yo ene Gabrel in a idu pang ye malala
mai yo ene Nasaret i. Ngan malala tani, in iken ye tana
mai Galili. Bangabangana tani in bet idu pang ye garup
nene atu yo ene Madia i. Ngan garup nene tani in
titarkala pang tamoto yo ene
Yosep i. Ngan Yosep tani in
Dawiti yo mugu ngan iyei tool
kuto mai i, in sasa ki.



Motong la bangabangana iwete panga nen, "Madia, ken kutattadai be. Maro lono pong mai san a iyeie urata dook mata pong. Le kulongo, ong i ole kapom ye kase tamoto atu. Le ye kene yo bet kupasuiu ye in nga, ngan ole kusu ene ye Yesu. Ye in ole ene mai, inbe ole tiweta bet ye in Maro yo inepe ete, in natunu."



"Inbe Tool Mai Maro ole
itaru a iyei tool kuto mai a ikolo
sasa ki yo Dawiti i. Inbe ye in ole
iyei tool kuto mai a matan kala
Yakop di sasa ki le ikenen leu
a ila. Moolmool, ye in ole iyei
tool kuto mai le ikenen leu
le taukan motingi."



Motong la Madia itoro bangabangana ke Maro tani in nen, "Ona, au i garup nene, inbe aye tamoto sa ampa pitiap. E so i nga ole pombe pang yau balai?"



Ngan bangabangana iraua betanga ki
nen, "Maro Amunu Silene ole isi
yong, inbe Maro yo inepe ete i, in
gurana ki ole si idukong. Le kase
tani yo Maro ipootoo panga ye
taunu a kapom ye i,
in ole di tooltool
tiweta bet ye in
Maro Natunu."



Ye kene tani in Madia ikarata so ki tina
ngan le imadit a ipa tarrai a ilo pang ye
malala mai atu yo iken ye
kawal ke tana mai Yudia
i. Ngan ipa le lo pombe,
motong la ilo rumu lono
ke Sakaria lo ikamata
Ilisapet, ngan le
iwete lo ponana
ki panga.



Ye kene yo Ilisapet ilongo lo ponana ke Madia yo iweta panga i nga, ngan le natunu yo iken kaponno lono i, in ipulles, inbe Maro Amunu Silene isi ipapono Ilisapet tani. Ngan nen le koonoo le mai nen, "Maro iyei urata dook mata pong le kullos di diem garup kapala nga le imot. Inbe iyei urata dook mata pang kase yo bet kupasuiu i, in lapau."



Gasanga ke Yesu Kirisi yo tinana ipasuiu i, in ipa nen.
Tinana yo Madia in titarkala pang Yosep bet iyooloo, bong yeru tigaua tiao, inbe tikamata Madia tani in kapono ye kase yo Maro Amunu Silene ikauu panga i. Ngan nintooroo yo Yosep i, in tool noonoonoo, le lono bet iwetewete Madia la mallangana a ipammoo la di tooltool le imot matadi tiap. Bong lon kaua urata bet ole ipas le isukraii mos leu le ikino sollono.



Bong tina yo lon kua urata nen nga,
le mooloo tiap inbe bangabangana ke
Tool Mai atu isi pombe pang ye, ye
mianga ki a iwete panga. Iyei ne,
"Yosep, ong in Dawiti natunu."



"Ken kutattadai a lom kap gogo dada belebele leu ye
yo Bet kouo Madia a kuyooloo, ngan be, yesoo kase yo
kaponno ye i, in Maro Amunu Silene la
ikauu panga i. Le ole ipasuiu natunu
tamoto, lo ngan bet kusu ene ye
Yesu, yesoo ye la bet ole ipamulu di
tooltool ki ye sennene kidi yo bet
igarung di i."



Yosep imi nen, le kene yo imadit ye in nga,
ngan le iyei ben tina yo bangabangana ke
Tool Mai iwete panga nga. Le ila la ikaua
Madia tani a iyooloo, a iyei rimana.
Bong kene yo iyooloo ye in nga, ngan
le yeru tipa le tiken toko pitiap le lo
Madia ipasuiu natunu tamoto tani.
Motong la Yosep isua
ye Yesu nga.



Ye kene tani in, ngan Sisa Agustus itara betanga medana atu pang di tooltool nga le imot yo tinepe ye tana mai Rom nga, bet di le imotole tiwodo edi ilo ye rau ke kaungu di tooltool edi.



Le nga di tooltool le imot yo tinepe ye malala kidi diedi nga, ngan timulumulu pang ye malala kidi tapdi, a bet la titar edi. Ngan Yosep tani in ipa ye rara ke Dawiti. Le nga imadit ye malala Nasaret ke tana mai



Galili a ilo pang Yudia ye malala mai ke Dawiti, yo ene Betlem i.



Ngan Yosep tani in ikaua Madia, yo titarkala panga bet iyooloo, in a yeru tilo bet lo titar edi ilo ye rau lapau. Bong ye kene tani, in Madia kapono maiyoko ke pasuiungu oo.



Le nga yeru tinepe
Betlem go, inbe lal yo
bet Madia ipasuii
natunu ye i, in pombe,
ngan le ipasuii
natunu tamoto
mumuganga.



Motong la iduku ye mala, inbe ipatakeno du ye koror
yo titar kainingi kidi asara ilo ye i, in lono, yesoo rumu
yo ke di lowo nga, ngan
ipon le imot.



Ye ni tani in di tooltool pattu tinepe ke diki ke malala
mai tani, a nen ngan bet bong ngan matadi kala di
asara kidi yo edi sipsip nga. Motong
la bangabangana ke Tool

Mai atu in
idu pombe
pang ye di,
inbe Tool
Mai lulngana

ilangarai di
le titattadai
mai san.



Bong ngan bangabangana tani in iwete pang di nen, "Oi, ken katattadai be! Kapalongo, au i akaua bingi dook mata pang la asi nga. Bingi dook mata tani in ole iyei di

tooltool nga le imot le lodi ponana belebele."



"Dookoot bong katai i, garup atu ipasuiu natunu malala
mai ke Dawiti. Ngan kase tani in Tool Mai Kirisi
yo mugu ngan Maro itara betanga
medana ye bet ole ikau

ang le
imot a
ipamulang
ye so dook
tiap

tani yo bet
igarungang i."



"Inbe tarkilanga ki yo bet lomu galanga ye, in nen. Ole kakamata kase atu yo tiduku ye mala, inbe tipatakeno du iken koror lono yo titar kaningi kidi asara ilo ye i."



Bangabangana ke Maro tani in iwete nen a imot,
ngan le pattu leu inbe di bangabangana
ke Maro liliti mai tipa ke malala ke
Maro a tisi
ye



bangabangana
tani a tikodo,
inbe tiyitmaka
Maro ene.



Tiyei ne, "Tayitmaka Tool Mai Maro yo inepe ete i,
in ene. Inbe di tooltool ke tana yo Maro
lono pang di mai san nga, ngan ole
ikaua lo silene ki



pang di a
tinepe ye."



Motong la di bangabangana ke Maro tina ngan tigege di sila tinepe, inbe timulu a tilo pang ye malala ke Maro. Le taun di tooltool yo matadi kala di asara nga, ngan timadit le tiyei ne, "Oo, nga ole talo pang Betlem a lo takamata so tani yo pombe ni a Tool Mai iweta paidi i."



Le nga tipa tarrai a tilo, ngan le lo tikamata Madia iye
Yosep inbe kase maitiap tani yo tipatakeno du ikenen
koror lono i. Tikamata kase tani a imot, motong la
tiwete tomonai betanga tina yo bangabangana ke
Maro in iwete pang di ye kase
maitiap tani nga.



Ye kene yo Madia ipasuiu Yesu
ye malala mai tiap Betlem ye
tana mai ke Yudia ye in nga,
ngan Erot iyei tool
kuto mai pang tana
mai yo Yudia i.

Inbe ye kene tani
in di tooltool ke bet tikamata
kanpitiki ngan lodi kava urata ye
nga, ngan pattu ke ni yo ke ipa ye
a ise i, ngan tilo pang Yerusalem
lo tipa a titortor di tooltool nen.



Tiyei ne, "Ai, kase
mai tiap yo tinana
ipasuiu a bet iyei
tool kuto mai pang
di Yuda i, in
inepe ngai?"

Am nga amkamata kanpitiki iyei
ben tarkilanga ki ye ni yo ke ipa
ye a ise i, ngan nanga la amse
bet se amsung panga nga."



Tiwete pang Erot nen,
motong la ikiu di tooltool
yo ke bet tikamata
kanpitiki ngan lodi kua
urata ye nga, ngan sollono
bet man iye di leu tigaua,
inbe itor panin di ye soo
lal moolmool yo kanpitiki
pombe ye i. Itor panin di
a imot, motong la
iwanga di bet
tila pang
Betlem nga.



Inbe iwete pang di nen,
"Kala ngan kasere kase in
dook le le kapusye. Le
bet kapusye nga, ngan
palbe leu be man kawete
pau a nen ngan au lapau la
akamata, a asung panga."



Ngan di tooltool yo lodi kaula urata ye di kanpitiki nga,
ngan tilongo betanga ke Erot a imot, motong la tigege
sila inepe, inbe tipa mulu. Ngan le tikamata



kanpitiki tani yo tikamata mugu
i, inbe titoo titoo le la tukbe
ke ete le iken ye ni tani



yo kase inepe ye i.
Motong la tilo rumu
lono a lo tikamata
kase tani iye tinana
Madia, motong tigung
turudi le du
damodi
toko
tana,



inbe
tisung
panga.



Motong la tipolo llugu kidi a tikap so dook mata panga;
so ben pat dook mata yo ene gol i, inbe so dook mata
san yo tarungu lo ye ei ngan kutana ikini dook
mata i, inbe so ke saliningi kini
ki dook mata san yo tiwete
ene ye mir i. Le nga tinepe a



nga tiken, ngan timi
bet Maro iwete
pang di nen, bet
timulu a tila pang ye
Erot be. Ngan la le
titoo dada san
a timulu
a tidu



pang ni
kidi nga.



Di tooltool tina ngan
timulu a tidu, motong la
bong a Yosep iken, ngan
ikamata bangabangana
ke Tool Mai ye
mianga ki.



Ngan bangabangana tani in
iwete panga nen, "Yosep,
kumadit a kouo kase in iye
tinana a kakoo a kala pang
tana mai Isip la kanepe
nango le lo awete pong
mulu ngan, yesoo Erot
ni ngo ikapge bet isere
kase i le ipusye nga,

ngan ole iraumate
a imata."





Yosep tani in imi nen, le nga
imadit tina le ikaua Madia iye
natunu bong a tikoo pang Isip,
a la tinepe tinepe le lo Erot
tani in imata. Ngan nen le
betanga yo Maro koonoo
iwete nga, ngan kanono
pombe moolmool. Mugu
ngan Maro koonoo tani
in iwete nen,



"Natuk tamoto inepe
Isip, le akiuu ngan la le
igege Isip a iman nga."





Erot itar tinini ngan tool sa
mala bet pombe pang ye a
iwete panga tiap. Le nga lon
tar nen, bet di tooltool tina
yo ke bet lodi kaula urata ye
kanpitiki nga, ngan o tillungu,
le katen malmal dook tiap.



Motong la iman tina le iwanga
di tooltool ki ke patokongo bet
la tiraumatamata di kakase
tamoto ke Betlem inbe di
kakase tamoto kapala yo tinepe
potai pang Betlem yo rai kidi ru
inbe isi pang lopo nga, ngan
le imot.



Yesoo, lal yo Yesu tinana
ipasuiu ye i, in ikauu ye di
tooltool yo lodi kaua urata
ye kanpitiki, ngan oo.





Yosep iye Madia tinepe Isip
le lo Erot imata, motong la
bong atu ngan Yosep iken
ngan imi bet bangabangana
ke Tool Mai atu iwete panga
nen. Iyei ne, "Yosep,
kumadit a kouo Madia
iye natunu a kamulu
pang ye tana kidi
Isrel, yesoo

di tooltool yo lodi bet
tiraumata kase i nga,
ngan timmata oo."



Bong ngan Yosep ilongo bet Erot natunu Akilus
in iloni a iyei tool kuto
mai pang tana mai
Yudia. Le nga Yosep
itattadai bet
imulu



pang ni nga.
Le ye mianga ki san
mulu, ngan bangabangana ke Tool
Mai iwete panga bet ila pang ni be, bong
bet idik a ila pang ye tana mai san yo Galili i.



Ngan tina ila nga,
ngan le la inepe
ye malala
atu yo ene
Nasaret i.



Ngan le iyeie betanga
kidi Maro koonoo yo tiweta in le
kanono pombe moolmool. Ngan betanga tani in
iwete nen, "Ole tiweta bet ye in tool ke Nasaret."



Maro lono pang di
tooltool ke tana i mai san, ngan la le
iraia Natunu tani yo ataleu in pang di
nga, a bet nen ngan di sima tooltool yo
titara lodi medana panga nga, ngan
bet tilledi be, bong tikaua
nepongo dook mata yo
taukan motingi i.



Rom (Rom) 3:23

Yesoo, di tooltool le imot ngan tiyei dada dook tiap ke sennene. Inbe di le imot tikapsap ye toongoo dada moolmool yo ke Maro nga, ngan la le tinepe manga mooloo ye Maro lulngana yo mai san i.

Rom (Rom) 6:23

Ngan nanga, urata kootoonoo yo ke sennene, in matenge, bong so yo bet Maro ikauu sorok paidi ye lo ponana ki i, in nepongo dook mata yo taukan motingi i. Le moolmool, Maro ole ikaua nepongo paunu yo ipa ye Tool Mai kiidi Yesu Kirisi i, in paidi, yesoo idi nga taye tagauagaua.

Ibru (Hibru) 9:27

Ngan idi tooltool le imot nga, ngan ole tammata pattu leu, lo ngan bet pang dama ni ngan Maro ole ikarata betanga kiidi.



Epeses (Efesus) 2:8,9

Le Maro ikau ang a ipamulang ye so dook tiap yo bet igarungang in nga, ngan ye lono yo pang mai san a bet iyei dada dook mata yo nen ngan pang nga. Ngan ang tapmu kayeie urata sa dook mata ngan la le Maro ikau ang a bet ipamulang ye, ngan tiap, bong in ben lo ponana ki pang. Ye in iyei nen, yesoo ye yo katara lomu medana pang Kirisi nga. Le moolmool, ang ngan kayeie urata sa ngan la le ikau ang a ipamulang ye, ngan tiap. Ngan nen le ke bet tool sa koon payiti a iwete bet ye in dada ki dook mata, ngan la le Maro ikau a ipamule ye, ngan tiap.

Rom (Rom) 10:9,10

Ngan betanga tina yo amwetewete pang di tooltool ye in nait; kumata bet ong in kuwete mallangana la di tooltool matadi bet Yesu in Tool Mai, inbe kutara lom medana bet Maro ipamaditi ye ni kidi matenge nga, ngan Maro ole ikau ong a ipamulong ye so dook tiap yo bet igarungong i.



Ngan nen, yesoo kumata le tool itara lono medana bet Kirisi imata motong Maro ipamaditi nga, ngan Maro ole iweta ye tool noonoonoo. Inbe kumata bet iwete mallangana la di tooltool matadi bet Yesu in Tool Mai nga, ngan ye in Maro ole ikauu a ipamule ye so dook tiap yo bet igarungu i.

Yowan (Jon) 3:16,17

Maro lono pang di tooltool ke tana i mai san, ngan la le iraiia Natunu tani yo ataleu in pang di nga, a bet nen ngan di sima tooltool yo titara lodi medana panga nga, ngan bet tilledi be, bong tikaua nepongo dook mata yo taukan motingi i. Yesoo, Maro iwanga Natunu a isi ye tana i nga, ngan bet si ipapos di tooltool ye urata dook tiap kidi yo tiyei nga, a bet nen ngan iyemenai di ye, ngan tiap. Bong iwanga a isi nga bet si ikap di tooltool le imot a ipamulu di ye so dook tiap yo bet igarung di i.



1 Yowan (Jon) 5:11-13

Inbe betanga tina yo Maro iwete paidi, ngan nanga: Maro in ikaua nepongo dook mata yo taukan motingi in paidi, inbe nepongo dook mata tani in ipa ye Natunu.

Nen le sei tool bet ikaua Natunu ngan ikaua nepongo dook mata yo taukan motingi i. Bong sei tool bet ikaua Maro Natunu tiap nga, ngan o ke bet ikaua nepongo dook mata tani in tiap lapau. Au i awodo betanga nga pang ang di tooltool yo katara lomu medana pang Maro Natunu nga, a bet nen ngan lomu galanga bet ang ngan kakaua nepongo dook mata yo taukan motingi i.



Matiu (Matyu) 1-2; Luka (Luk) 1-2

Storyline by: Edward D. Hughes

Illustrated by: M. Maillot
and Alastair Paterson

Adapted by: E. Frischbutter; Sarah S.

Arop-Lokep Bible (apr) © 2023 Wycliffe Bible
Translators, Inc. All rights reserved.

<https://live.bible.is/bible/APRWBT/MAT/1>

©2024 Bible for Children, Inc.

www.M1914.org

www.bibleforchildren.org

